

# The Electronic Manipulus florum

www.manipulusflorum.com

## Penitencia ai cum fonte primo

Fugite, inquit, de medio Babilonis et saluate animas uestras. Conuolate ad urbes refugii ubi possitis et de preteritis agere penitenciam et in presenti obtinere gratiam et futuram gloriam fiducialiter prestolari. Non uos retardet consciencia quia ubi peccata habundauerunt, superhabundare consueuit et gracia, nec penitencie austeritas ipsa deterreat. Nec enim condigne sunt passiones huius temporis ad preteritam culpam que remittitur, non ad presentis consolationis gratiam que immittitur, non ad futuram gloriam que promittitur.

Si uerbis non creditis, operibus credite, exemplis acquiescite plurimorum. Currunt undique peccatores ad penitenciam et natura pariter et consuetudine delicati,

nil credentibus impossibile, nil amantibus difficile, nil asperum mitibus, nil humilibus arduum reperitur quibus et gracia sit in auxilium et obediendi deuotio lenit imperium.

Bernardus in quodam sermone.

Fugite de medio Babylonis, fugite et saluate animas uestras. Conuolate ad urbes refugii, ubi possitis et de praeteritis agere paenitentiam, et in praesenti obtinere gratiam, et futuram gloriam fiducialiter praestolari. Non vos retardet conscientia peccatorum, quia ubi illa abundauerunt, superabundare gratia consuevit. Non paenitentiae austeritas ipsa deterreat: neque enim condignae sunt passiones huius temporis ad praeteritam culpam, quae remittitur; non ad praesentem consolationis gratiam, quae immittitur; non ad futuram gloriam, quae promittitur nobis. Denique nulla est tanta amaritudo, quam non prophetica farina dulcoret, quam non sapidam reddat sapientia, lignum vitae.

Si uerbis non creditis, operibus credite, exemplis acquiescite plurimorum. Currunt undique peccatores ad paenitentiam, et natura pariter et consuetudine delicati exteriorem omnino asperitatem non reputant, ut exasperatae conscientiae leniantur.

Nihil credentibus impossibile, nil amantibus difficile, nil asperum mitibus, nil humilibus arduum reperitur, quibus et gratia fert auxilium, et oboediendi deuotio lenit imperium.

Bernardus Claraeuallensis, *Sermo de conuersione ad clericos (textus longior)*, 37-38 (SBO 4, J. Leclercq, C.H. Talbot, H.M. Rochais eds., pp.113-14, ll.16-22, 1-8).